

摘藻堂四庫全書薈要

集部

欽定四庫全書薈要卷二萬五百七十一

集部

明詩綜卷九十八

妓女

翰林院檢討朱彝尊編

靜志居詩話明制南北都各立教坊司北有東西二院南有十四樓其後南都舊院特盛成弘間院中色藝優者結二三十姓為手帕姊妹每月節以春檠巧具殺核相鬪名為盒子會沈啟南曾為作圖係以長句然青樓之題詠無聞也隆萬以來冶游漸盛浙有沈水部某託名冰華梅史以北京東西院妓郝筠等四十人配作葉子牌金沙曹編修大章立蓮臺新會以南曲妓王賽玉等一十四人比諸進士榜一時詞客各狎所知假手作詩詞曲子以長其聲價於是北

里鮮有不作韻語者其偽真無由而辨識矣姑從諸家選本綴錄成卷

趙麗華 二首

麗華字如燕小字寶英南院妓自稱昭陽殿中人

詩話如燕父銳以善歌樂府供奉康陵如燕年十三錄籍教坊能綴小詞被入絃索子嘗得其書畫扇楷法絕佳後題云乙卯中秋同西池徵君質山學士集海濱天香書屋書此竟聞任兵憲在陸涇壩禦倭大捷奏凱回戈亦快事也沈嘉則為作傳有云趙雖平康美人使具鬚眉當不在劇孟朱家下今即其題扇數語豪宕可知賦別一詩亦手書便面者

答人寄吳牋

感君寄吳牋，牋上雙飛鵲。但效鵲雙飛，不效吳牋薄。

席上賦別

妾舟西發君舟東，頃刻天生兩處風。此去雲山天際渺，寸心千里附冥鴻。

朔朝霞一首

朝霞金陵妓

送人

秋風江上送君舟落葉江楓總別愁解纜不知人去遠
凭闌猶倚夕陽樓

姜舜玉一首

舜玉自號竹雪居士南京舊院妓

花源逢顧何二使君作

仙源凡幾曲夾岸桃花開忽漫逢劉阮殷勤勸酒杯

徐翩翩一首

翩翩字飛卿一字驚鴻南院妓有集

詩話翩翩年十六時名未起學琴不能操縵學
曲不能按板因舍而學詩謝少連於衆中見之
此陳王所云翩若驚鴻者也由是人咸以驚鴻
目之有妹亭亭字若鴻亦慧黠翩翩晚嫁江陰
郁生郁卒還秣陵關為
尼居蓮子營小巷以老

江陰送顧太學

一日發江口五日下長洲可惜送君淚不隨江水流

趙彩姬四首

彩姬字今燕南院妓

冒伯魯云較書容與溫文清言楚楚徐孀老去枇杷

花下閉門居風

流猶可想也

詩話今燕張幼于所狎名冠北里時曲中有劉
董羅葛段趙何蔣王楊馬褚先後齊名所稱十
二釵也晚居琵琶巷口冶游少年
號曰閉門趙四其詩格頗勝諸人

暮春江上送別

一片潮聲下石頭江亭送客使人愁
可憐垂柳絲千尺不為春江綰去舟

憶故居

柳絮春泥玉壘封珠簾深鎖暮烟濃
分明記得雙棲處夢繞青樓十二重

送幼于還吳門

花前雙淚濕衣裾
把酒江亭落照餘
此去吳門霜月滿
逢人好寄洞庭書

寄陳八玉英時留姑蘇

何處簫聲獨上樓
傷心桃葉水空流
一從南國春歸後
無復佳人字莫愁

馬守真一首

守真字湘蘭一字玄兒又字月嬌金陵妓有集

詩話湘蘭貌本中人而放誕風流善伺人意性復豪俠恒揮金以贈少年感吳人王伯穀解墨郎之阨欲委身焉伯穀不可萬厯甲辰秋伯穀年七十湘蘭買樓船載小鬟十五造飛絮園置酒為壽晨夕歌舞流連者累月亦勝引也伯穀序其詩大畧云秣陵佳麗之地青樓狹邪之間桃葉題情柳絲牽恨胡天胡帝為雨為雲有美一人風流絕代問姓則千金燕市之駿託名則九畹湘江之英輕錢刀若土壤翠袖朱家重然諾如丘山紅妝季布爾其搦琉璃之管字字風雲擘玉葉之牋言言月露翻庭花之舊曲按子夜之新聲奚特錦江薛濤標書記之目金昌杜韋惱刺史之腸而已哉曲中傳為佳話

自君之出矣

自君之出矣不共舉瓊卮酒是消愁物能消幾箇時

姚園

客云誦之

令人酸楚

朱無瑕 一首

無瑕字泰玉金陵妓有繡佛齋集

秋閨曲

芙蓉露冷月微微
小苑風清鴻鴈飛
聞道玉門千萬里
秋來何處寄寒衣

孫瑤華 一首

瑤華字靈光金陵妓歸新安汪景純有遠山樓

稿

次韻汪仲嘉戲代蘇姬寄吳郎之作

由來歡愛說新知空結同心不自持
山上蘼蕪寧再遇西陵松柏詎相期
羅襦明月君休繫紈扇秋風妾不辭
極目自憐春欲盡流鶯飛處草離離

崔重文一首

重文字媚兒一字嫣然南院妓

別黃玄龍

楓落鴉翻秋水明
長橋獨樹古今情
尋常歌板銀罌地
從此傷離不忍行

鄭如英一首

如英字無美桃葉妓

詩話無美以韶豔聞曲中呼為妥十二
妥其小名也詩筆流便但不暇持擇耳

雨中賦別

執手難分處
前車問板橋
愁隨風雨長
魂為別離消
客

路雲兼樹妝樓暮又朝心旌誰復定幽夢任搖搖

景翩翩 二首

翩翩字三昧

一作驚鴻

建昌妓嫁丁長發丁為人誣

訟于官景竟自經有散花吟

詩話王伯穀題散花吟云閩中有女最能詩寄我一部散花詞雖然未見天女面快語堪當食荔支翩翩家本盱江時游建安故伯穀誤以為閩中女子也時又有沙飄飄新都謝少連撰季漢書成其友釀金賀之布席齊王孫第四方之士會者百人選六院麗人侑酒飄飄為冠評者比之揚州蕃釐觀瓊花未有兩樹云

襄陽蹋銅蹄

駿馬蹋銅蹄金羈豔隴西郎能重意氣妾豈向人啼

與蘇生話

十日平原飲三秋江上船一經搖落後明月幾回圓

薛素素一首

素素小字潤孃嘉興妓有異才數嫁皆不終有

南游草

詩話薛五較書有十能詩書琴奕簫而馳馬走索射彈尤絕技也予見其手寫水墨大士甚工

董尚書未第日授書永中見而愛之為作小楷
 心經兼題以跋至山水蘭竹下筆迅掃無不意
 態入神聞在京師挾彈走馬能以兩彈丸先後
 發使後彈擊前彈碎于空中又置一彈于地以
 左手持弓向後以右手從背上反引其弓以擊
 地下之彈百不失一嘗置彈于小婢額上彈去
 而婢不知江都陸無從歌云酒酣請為挾彈戲
 結束單衫聊一試微纏紅袖袒半鞬側度雲鬟
 引雙臂侍兒拈丸著髮端回身中之丸並墜言
 遲更疾却應手欲發未停偏有致范夫人贈詩
 云重開別院貯文君寶絡千金換翠裙非雨非
 雲香滿路前身應是薛靈芸尋為李征蠻所嬖
 又嘗侍沈孝廉景倩巾櫛其畫象傳入蠻峒西
 陽彭宣慰深慕之費金錢無算致之不得也

春日過茅山

參差臺殿闕靈蹤
句曲茅君次第逢
洞口鶴窺曾過客
日中人上最高峰
華陽澗水桃千樹
舊館壇碑闕幾重
遙望金沙何處是
浮圖千尺罩烏龍

張回一首

回字淵如一字觀若金陵妓

送別賦得帆影

勞勞亭上別無計
共君歸一葉隨風去
孤帆挾浪飛目
窮河鳥盡望斷浦
雲非後夜相思處
傷心隔翠微

羽孺一首

孺字素蘭一字靜和常熟人生不識姓善音律
推律得羽聲遂以為氏後為人所殺有詩集

柳

草閣疎林迴簷前遶綠楊章臺憐御苑灞岸惜他鄉繫
馬青春晚藏烏子夜長玉關頻折贈離思斷人腸

周文一首

文字綺生嘉興妓

沈宛君云綺生初出平康終
歸匪匹鬱志而死遺稿甚多

不傳良可惜也

詩話綺生善小詩沈純父林居端午召客呼之
侑酒不至次日始來問其故曰昨偶席上賦詩
未就耳純父曰爾能詩試即景以五月六日為
題綺生朗吟云酒剩蒲觴冷門懸艾虎新坐客
咸擊節由是詩名大起縉紳若高玄期李君實
皆與酬和綺生嘗有句云掃眉才子多相忌未
敢人前說較書益自傷也虞山列朝詩集謂為
松陵一元氏負之而趨悒鬱而死所云一元氏
者除名會元沈同和志學也子於乙酉冬猶及
見之酒間談論援今證古媿媿不休亦未至以
五七言讀詞回環迄不能
句第於帖括則全不解耳

詠懷

幾點愁人淚不許秋風吹吹到長江裏江流無盡期

呼文如一首

文如小字祖江夏營妓與丘謙之綢繆和荅有

遙集編

詠庭中安石榴呈丘生

安石孤根託謝庭合歡枝上日青青懸知雨露深如許
結子明朝似小星

王微六首

微字修微揚州妓飯心禪悅自號草衣道人初
歸歸安茅元儀晚歸華亭許譽卿皆不終有期
山草樾館詩集

重過雨花臺望江有感

春姿靜東岑雲影結遙粲坐覺高臺空不知翠微半落
花自古今啼鳥變昏旦撫化良易遷即事聊成玩况乃
晴江開淥波正拍岸

有人以斷腸草寄怨予偶見戲反之

木名有連理草名有宜男花有枝並頭禽有翼鷓鴣西
方鳥共命東海魚比目輕鸞千二百鴛鴦三十六相思
為唐殿合歡是漢宮雀屏開甲乙龍劍匣雌雄之子賦
斷腸稱物作苦語聊拈佳耦名其他未遑舉

夾山漾別陳仲醇

夾山寒水落木葉下紛紛斜日已難別扁舟况送君瑤
華一以折零露不堪聞為我題紈扇新詩寄白雲

仙家竹枝詞

幽蹤誰識女郎身
銀浦前頭好問津
朝罷玉宸無一事
壇邊願作埽花人

憶江南

寒沙日午霧猶含
蕭瑟風光三月三
撲地柳花新燕子
不由人不憶江南

湖上早起

中流何處聽雞鳴
只看船牕煙霧生
剛到五更翻睡去
急披衣起已天明

蔡彬一首

彬字清卿江都妓

贈別

傷情不奈出宜春
遙見離亭倍愴神
昨夜樓頭好明月
今宵分照遠行人

郝婉然一首

婉然字蕊珠京師珠市妓有調鸚集

鳳皇臺

雨過荒臺春草長
浮雲暗處是斜陽
杏花零落知多少
黃蝶翻飛野菜香

李貞儷 一首

貞儷字澹如桃葉妓有韻芳集

月夜有懷

不見風前舊令君
滿庭霜月白於雲
仙居只隔清谿曲
此夜鐘聲應共聞

茹瓊 一首

瓊錢塘妓許歸金華唐生生負約嘔血卒

元夕

湖南湖北雪初消
畫鼓春幡總寂寥
不是鄰家燈火近
那知今夕又元宵

楊宛四首

宛字宛叔金陵妓有鍾山獻正續集

茅止生云宛叔歸余

年纔十六能讀書工小楷其於詩游戲涉畧若不經意然無枯澀之色鮮潤流利

詩話止生得宛叔深賞其詩序必稱內子既以謚荷戈則自詡有詩人以為戍婦兼有句云家

傳傲骨為迂叟帝賚詞人作細君可云愛惜之
至顧宛叔恒思背之秋懷詩云獨自支頤獨自
愁深情欲語又還羞從來薄命應如此敢比鴛
鴦到白頭棘心已露矣止生亡後思倚國戚田
弘遇以其賄遷不期弘遇第以衆人畜之尋俾
其授琴書於季女甲申寇變宛叔攜田氏女至
金陵匿山村中盜突入其室欲汙田氏女女不
從宛叔從旁力衛之遂同遇害詩如江清風定
候山碧鴈來天亦稱佳句其行楷特
工能於瘦硬中逞姿媚洵逸品也

種桐

靜居無寄懷種桐廣除內桐高盈丈餘風露相吸逮本
以遲鳳棲鳳棲不可再我聞古良士往往思其外預愁

斲為琴知音復誰在

哭侍兒湘雲

湘水千年在湘雲去不回
牀頭鍼線帖此後更誰開

春日有感

翠館紅樓白石橋
高花低柳自飄飄
畫闌幾處無人到
多少春光暗裏銷

次止生七夕見懷韻

遙遙望斷白蘋洲
惟見銀河一派流
那得閒情還乞巧

夢魂尋遍木蘭舟

顧娟娟

一首

娟娟嘉興妓


詩話娟娟居蘇小小墓東北短小禮粹妙歌舞
雙鞵柔弱胡旋燈前觀者靡不歎絕間作小詩
以書法不工偶對人口
占而已崇禎末年卒

贈別

南國相思子西番篤壽香留君充雜佩休賭紫羅囊



明詩綜卷九十八



總校官庶吉士 臣張能照

校對官檢討 臣蕭九成

校對官庶吉士 臣嚴福

謄錄貢生 臣傅瓌芳

謄錄監生 臣顧振

欽定四庫全書薈要

集部

明詩綜卷

九十九
一百

詳校官編修臣汪鏞



欽定四庫全書薈要卷二萬五百七十二

集部

明詩綜卷九十九

神鬼 物怪附

翰林院檢討朱彝尊編

皋一首

皋羅源人閩王璘時常嚮黃精于市龍啟間為

道士陳守元所辱故人木當敏因背之去尋入

仙茅山羅喜洞當敏尾之望見洞中玉堂金闕

麗人被珠襦者百數皋至皆却行前迎建翠於



孔蓋當敏大駭頓首謝罪臯目笑之有頃宴客
堂上盛設食飲畀當敏以僕妾之餐坐之堂下
然亦非人世所有滋味居十日當敏辭歸臯及
賓客送之至洞門客吹尺八擊玉磬臯和而歌
云云歌畢忽然俱去當敏歸城郭人民盡非昔
日蓋洪武之十二年矣

歌

朝為雄兮暮為雌
天地終盡兮人生幾時

徐電發云足
比彭令昭所

歌人間可
哀之曲

貞元道人 一首

徐州鄧玉田扶卞仙子都下題詩畢自稱貞元
道人

詩

勾漏山頭古洞天金堂玉室地相連門前千尺長松樹
親手栽來不記年

無上宮道人 一首

仙游歌

靜志居詩話萬歷庚寅秋古鄆吳道人以符籙游江淮間尋抵嘉禾仙降于周處士履靖逸之宅有曰無上宮道人有曰崖老縛筆于叶揮灑若風雨之驟由是彭輅子殷文嘉休承皇甫子循張之象月鹿侯一元舜舉李奎伯文仇俊卿謙之馮皋謨明卿莫雲卿是龍李日華君實異而交和之處士哀為一卷子殷序之君實跋其尾焉

君不見蓬萊縹緲三山幽天風萬里羣仙游光分日月
五城界春滿烟霞十二樓洞門桃花歲復歲巖前桂樹
秋復秋羣仙游兮上玉京翩翩自適春風情鞭龍或耕

瑶草去騎鹿愛遶青松行感藻日之邁征歎浮生之易
邁信人間之可哀留幔亭而高會有時采藥來天台迷
花宿霧臨瑶臺五三六點靈雨滴百千萬樹梨花開主
人置酒初醺醅我今暢飲休相催風光如此不盡醉虛
負青華赤玉杯

崖老 一首

詩

乍下人間世何須問姓名翩翩臨水影窅窅步虛聲恣

草黃庭帖還調碧玉笙江南美風物九月采蒹葭

降道人一首

探梅

詩話崇禎辛巳道人題畢人莫會意王翊曰道人起句謂舟輕則速十里之行等五里雪霽而殘一山所積止半山爾
外書王子可與言詩

輕舟十里五里殘雪一山半山我意探梅獨往誰教放
鶴先還

轉華菴卜仙一首

福州西關外轉華菴壁挂叶仙詩字體飛動不
類人間書見閩小記

綠雲出洞又入洞黃鶴下山復上山道人此日歸何處
雲自無心鶴自還

侯官叶仙一首

嘉靖中倭亂起侯官張經總督浙直軍務經行
止未能決質之召叶者叶動大書曰我關雲長
也題詩云云經殊惡之後遭讒棄市

詩

萬里縱橫事已空
戰袍裂盡血猶紅
夜來空有思鄉夢
雨暗關河路不通

百泉書院降神詩一首

天啟二年五月杞縣趙彥復集客于百泉山書院有神降叶題詩彥復曰神得非淮陰侯邪曰然

詩

相逢奚必定知名九里山前殺氣橫不及清淮一竿竹
風波靜處過平生

清真觀童子 二首

崑山柴奇讀書於清真觀夜二鼓月色如晝忽
見五童子披鶴氅麾羽扇從空而下為迴波之
舞歌曰云云見周玄暉涇林續記

歌二首

駕而風兮策而霆乘白鶴兮入蒼冥山青青兮海澌澌

壁為月兮珠為星
駕赤虯兮上玄冥
水瀟瀟兮嶽亭亭

晚翠亭鬼一首

載葉世奇草木子

詩

一徑入青松
飛流澹晴綠
道人晚歸來
長歌振林谷
山深不知秋
落葉下枯木
須臾翠烟開
月色照綵服

鄭婉娥一首

吳江沈韶
洪武初汎舟游襄漢
次九江登琵琶

亭月下彷彿聞歌聲明日復往徙倚亭中有麗
人來呼韶並茵坐曰妾偽漢主婕妤鄭婉娥也
年二十而死殯於亭側因口占一律贈韶且命
侍兒鈿蟬取酒韶與留連半載談元末羣雄興
廢及偽漢宮中事歷歷可記臨別以金跳脫為

贈

贈沈生

鳳艦龍舟事已空銀屏金屋夢魂中黃蘆晚日虛殘壘

碧草寒烟鎖故宮
隧道魚燈膏欲燼
妝臺鸞鏡匣長封
憑君莫話興亡事
淚濕胭脂損舊容

吳師禹 二首

成化中侯官吳師禹於吳嶼結屋月夜載酒遍
飲漁翁至嘉靖間已物故士人張君壽八月幾
望舟泊吳嶼忽上流一翁盪槳而歌云云君壽
刺舟與語翁曰我吳師禹也君壽不知其已死
偕訪其家酒行復賦詩云云夜既闌遂寢旦覺

乃在叢莽中詩箋尚在觸手成灰

詩

蓼香月白醒時稀潮去潮來自不知除却醉眠無一事
東西南北任風吹

又詩

世路無媒君莫悲開闌看取牡丹枝姚黃魏紫俱零落
能得春風有幾時

董槐一首

萬歷中閩人董槐能文彊記年十七而沒殯於
里之龍山長見形為母護湯藥墓上樹蟲齧成
字或螳緣土為字皆成詩句末必書行仙董郎

詩

原南原北綠如煙萬轉千聲鳥可憐
擷得榆錢盈兩袖
春風寒食自年年

詠松僧一首

詩

庭前兩株松風吹一株折朝減半庭陰夜露半庭月

楊玉香 一首

成化中閩人林景清以鄉貢北上不第歸過金陵戀伎楊玉香既別而玉香天泊舟白沙玉香魂夜至有詩和酬再過金陵訪之則死已一月矣撫棺而慟是夜獨宿見玉香從帳中出吟詩云云

答林生

天上人間路莫通
花鈿無主畫樓空
從前為雨為雲處
總是襄王一夢中

小水人 六首

安成彭氏築菴山中命僕守之暮有女子自稱
小水人徑入臥室僕固拒之女云只見船泊岸
不見岸泊船何無情乃爾尋登僕榻僕懼取佛
經執之女笑云經從佛出佛豈在經邪天將旦
僕起擊菴鐘女取髻上牙梳掠鬢忽走入松林

不見壁上題詩云

妾住小水邊君住青山下
青年不可再白日坐成夜
只見船泊岸不見岸泊船
豈能深谷裏風雨誤芳年
薄情君拋棄咫尺萬里遠
一夜月空明芭蕉心不展
解下羅裙帶無情對有情
不知妾意重只道妾身輕
經從佛口出佛不在經裏
郎在妾心頭郎身隔千里
月色照羅衣永夜不得寐
莫打五更鐘打得人心碎

王秋英 一首

嘉靖中福清諸生韓夢雲過石湖山見遺骸哀
而掩之是夜宿藍田書舍一麗人斂衽拜燈下
曰妾王秋英字澹容楚人也父德育元至正間
以兵曹郎叅軍入閩妾從父之官遇寇投厓死
荷君子厚德惠及骸齒是亦夙世緣也遂定情
焉生一子曰鶴算萬曆癸巳揮淚而別事載萬
鳥啼春集

歸楚留別夢雲

兩年歡會夢魂中聚散人間似轉蓬歲月無情催去燕
關河有信寄來鴻劔沉延浦光終合瑟鼓湘靈調自工
他日扁舟尋舊約夕陽疎影楚雲東

冬橘一首

女鬼冬橘張校官致祥遇之

秋夜吟

幽蛩響寒砌白露墮寒石獨立看月明不覺羅衣濕

莆田女鬼一首

萬曆初莆田有王太守良臣者築園亭郊外且
傾圮矣崇禎中邑諸生梁鼎鐘假為學舍有女
夜至自稱太守女鼎鐘與定情三年一夕別去
作詩以贈生

別梁生

側側復力力與君長歎息出入自苦愁單情還相憶

西寧侯邸花神 二首

閩人鄭琰翰卿客西寧侯邸晝夢黃衣少年要

至廡下共飲少焉一麗人至少年自起舞歌春
游之曲云云次及麗人作迎風之舞歌春愁之
曲飲正歡少年駭曰文羌校尉來矣見一人綠
袍張目至前遂罷席而寤起視庭中牡丹一花
映日婉媚一黃蝶猶未去則少年也一螳螂長
二寸集葉上是為文羌校尉麗人則牡丹花神
云是年西寧侯薨

春游曲

芳草多情王孫未歸遲我良朋東風吹衣

春愁曲

金衣公子話春愁幾度留春更不留昨日漫天吹柳絮
玉人從此懶登樓

妖鼠詩一首

成化二年長樂陳豐獨坐山齋梁上二鼠相鬪
忽墜化為二老翁長可五六寸對坐劇飲聲如
小兒既而二女子歌舞勸酬歌詞云云酒既闌

乃合為一大鼠向豐作拱揖狀而去載晉安逸
志

歌

天地小如喉紅輪自吞吐多少世間人都被紅輪誤

張秋鴉語

宗禎戊寅張秋鴉作人語云云未幾李青山作
亂殺人盈野歲饑民剥樹皮食之棗一升值錢
五百竟東西四百餘里寂無人載張怡謏聞續

筆

人少人少無米怎了

明詩綜卷九十九

欽定四庫全書薈要卷二萬五百七十三

集部

明詩綜卷一百

雜詠歌辭

翰林院檢討朱彝尊編

靜志居詩話昔漢孝武立樂府采歌謠班孟堅謂代趙之謳秦楚之風皆感於哀樂緣事而發可以觀風俗知薄厚故郭茂倩編樂府詩集雜謠歌辭包括無遺余特仿其例撫采附於卷末惟夫童謠輿誦及田家雜占未嘗師法古人出於天地自然之音世治之汙隆人材之邪正莫不一本好惡之公所謂詩可以觀者是已繹遂燕之旨知革除本自皇衷諷雨帝之言信奪門元非人事苟察於耳介葛盧之於牛元師翁偉之於馬公治長之於鳥猶將欣然遇之載諸篇

籍矧無戾於春女之思秋士之悲者乎年來史
局雖開汗青無日留此以俟撰五行志循吏傳
者采
擇焉

劉侯歌

永樂中山陽劉安知南宮縣勤於撫字境內旱
蝗率吏民步禱蝗亦頓絕是歲鄰邑皆饑惟南

宮大稔民歌曰

侯宰南宮民和政通蝗不入境今之魯恭

何鐵面

永樂中仁和何灝官刑曹郎持法不避貴勢京師語曰

毋縱誕避何鐵面

京師語

潁上李芳中永樂中進士任刑科給事中執法不撓忤權倖謫海鹽丞棄官居家宣宗嘗顧問曰李芳何在近倖畏其剛直多沮之京師為之

語曰

永樂紀綱宣德李芳

京師語

正統戊辰京師語云云是年安福彭時殿試賜
第一甲第一名

莫問知不知狀元是彭時

京師童謠

正統中京師羣兒連臂呼于塗曰正月裏狼來
敲豬未一兒應曰未也循是至八月則應曰來

矣來矣皆散走時方旱又有羣兒歌於塗云云
既而有狼山之難

雨帝雨帝城隍土地雨若再來還我土地

京闈語

景泰癸酉廬陵羅崇嶽舉順天鄉試第一以詭
籍斥還後三年大學士陳循子瑛王文子倫入
試皆不得舉有旨特賜舉人時人語曰

榜有姓名還是學生榜無名氏京闈貢士

翰林語

茶陵李東陽等為翰林長而王九思等為檢討
時人語云

上有三老下有三討

京都語

成化中光州熊翀官兵部侍郎時馬文升為尚
書而侍郎有左熊右熊京師語云

兩熊一馬太平天下

京師語

弘治中鍾祥沈文華為刑部員外郎事多平反
京師語云

有事勿忙須問沈郎

京師語

麥公牢子崔公馬高公銀子當博瓦

都下諺

吏科官戶科飯刑科紙工科炭兵科阜隸禮科看

安州語

蘇州張寅仲明中正德辛巳進士知安州浚牙
家港築隄暇則與士子講學時孔天胤知祁州
亦以才見重時人語曰

有所疑問安祁莫憂竦有張孔

京師語

嘉靖五年天台起復知縣潘淵進嘉靖龍飛頌
效蘇蕙織錦圖帝以其文縱橫莫辨使開寫正

文以進是時請建世室者有監生王淵進世廟
頌擢上林監丞京師語曰

兩淵口闊如斗笑殺張蘿峰引出一羣狗

疫無鬼

容城楊繼盛少時讀書僧寺時僧多病疫同舍
生咸亡去繼盛為調藥餌僧以次愈時人異之
語云

疫無鬼以為不信視楊子

都中歌

嘉靖中土木繁興一時工曹驟增數員都中歌

曰

馬頭雙馬後方督工郎

東鹿語

濮州蘇祐補東鹿知縣邑多囚繫下車一日釋
數百人明日革罷徭車三十兩又明日有詔召
東鹿令邑人語曰

三日官府百年父母

翰林語

京山李維楨在翰林博聞強記與新安許國齊
稱同館語云

記不得問老許作不得問小李

得山禽

萬歷中合肥黃道月好挾少年岸幘衣半臂紫
袷坐驄馬挾彈游西山時人從之語云

得山禽從舍人

燕人諺

過了八達嶺征衣添一領

北地諺

駱駝見柳渴羌見酒

富林語

華亭曹時中與兄泰隱富林以詞翰自老時人

語云

富林二曹一時人豪

道士歌

建文中京師有道士歌于塗云云

莫逐燕逐燕起高飛高飛上帝畿

况太守歌

宣德中况鍾知蘇州府稱治最秩滿去民叩闕
留者八萬人吳人歌曰

况太守民父母早歸來樂田叟

興化謠

蒲政四川舉人正統六年任揚州興化主簿寬
恕廉靖民謠云

蒲政打蒲鞭青布綠了邊九年三考滿不要一文錢

江陰歌

天順中昌黎周斌以御史論劾曹石謫知江陰
縣士民愛戴之歌曰

早為災我公禱甘雨來水為患我公禱陰雲散

淮上歌

瀋陽范總中正德丁丑進士歷官兩淮運使盡
革夙弊遷四川叅政以去商民立祠淮水上為
之歌曰

范來早商民飽范來遲商民饑

興化民歌

嘉興孫璽知揚州興化縣事有土豪徐恩入貲
為千戶交結權貴橫行鄉曲璽以法殺之民歌

曰

彼惡人兮虎翼而飛惡人既殺兮公瘠我肥

嘉靖中童謠二首

賣槍纓人上城

茄頭下人走馬

留都語

扶溝劉自強嘉靖中官應天府尹尋轉都察院
右都御史進戶部尚書再改兵部居官峻法一

尚書囑以事怒曰賊吏敢爾邪起奮筆外其隸
人留都為之語曰

尚書賊輿臺僵矯矯劉公洵自強

吳下語

吳人皇甫沖兄弟四人並有盛名既而張鳳翼
兄弟三人亦有名於時吳下語云

前有四皇後有三張

吳人語

長洲文震孟性孝友居翰苑未踰年罷官家居
吳人語曰

求忠臣須孝子翳為誰文文起

興化歌

廬陵陸某知揚州興化縣事將入覲報政民歌
之曰

昔來何遲今去何速惠我弗終昭陽之陸

涇縣歌

嘉興高承埏知涇縣將去民歌之曰

眇公車來何暮計公程去何馬公內召我何之急攀轅
告上司上司揚言不可止入都門見天子

如皋謠

長山王崧生中崇禎庚辰進士知揚州如皋縣
事性愛畜蝶民有罪當笞者輸蝶得免羅致千
百召客飲縱之以為樂邑人語曰

隋堤螢火輟縣官放蝴蝶

江南諺

江南田家占雨諺曰

甲申尤自可乙酉怕殺我

按二語宋時即有已見范石湖詩注而江南至今傳之終

為亡國之讖

南京諺

福藩稱制江南馬士英阮大鍼等用事一時倖進者衆南京為之語曰

職方賤如狗都督滿街走

南京童謠

一匹馬走天下騎馬誰大耳兒

詩話指士英阮大鍼也時又有對聯云闖賊無門匹馬橫行天下元凶有耳一兀坐擾中原

南京童謠

楊柳青放風箏

吳諺 二首

官糶辦便無飯

南道如虎升官半府

吳中諺 六首

有利無利但看二月十二

花朝日晴則百果多實

三月溝底白沙草變成麥

三月無雨麥乃有收

六月不熟五穀不結

秋孛鹿損萬斛

立秋日不宜雷

若要麥見三白

冬至逢第三戌為臘臘前雪三次謂曰三白大宜菜麥

除夜犬不吠新年無疫厲

除夜宜靜

常州語

江陰莫動手無錫莫開口

江陰人拳勇
無錫人善歌

惠山謠

惠山街一名綺塍街夾路古藤喬木謠云

惠山街五里長踏花歸鞵底香

解州歌

永樂中浮梁吳惠知解州民歌曰

吳父母恩何溥昔憔悴今鼓舞

山西謠

正德中歷城徐暹為山西副使時有巨寇號混
天王劫掠郡縣暹以計平之民乃語曰
不發一矢賊乃盡死不荷厥戈賊死實多

吳公謠 二首

吳江吳山為山東副使獄無滯囚時有塞井復
漂民為謠云云既而遷福建按察使聽訟明允
民又謠云云

彼泥者泉弗浚而復錫我則福

鳳之棲其雛來儀民具是依

諸城縣漢王山西南五里有卷簾莊雖嚴冬無霜
降邑人諺云

卷簾莊秋冬不下霜

德州諺

德州苦水舖土人素狡諺云

苦水舖神仙過留筒布

山東謠

霑化李魯生日照李蕃天啟中交結奄宦以鬻爵為事青兗間謠云云後魏璫敗魯生蕃俱以太僕少卿擬徒

若要起問二李

通許諺

通許婁良與同郡賈恪齊名兩人皆中正統進士邑人諺曰

婁良賈恪氣如山嶽

太康謠

博興韓珮令太康多異政蝗不入境民謠曰
欲蝗不復墮須是韓公過欲蝗不為災須是韓公來

禹州歌

上海潘恩知禹州州人語曰

莫相仇避潘侯

郭公讖

嘉靖元年河南巡撫何天衢命百戶丕修月堤

發一古冢塋上朱書云云塋空其中人以為琴

几

詩話崇禎中帝製於變時

雍琴曲曾取此塋入禁

郭公塋郭公墓郭公逢著千百戶巡撫差爾修月隄臨
時讓我三五步

慶陽軍中語

洪武初張良臣復據晉陽以叛其兵精悍養子
七人咸善戰軍中語曰

不畏金牌張但畏七條鎗

臨洮歌

潞城劉昭宣德中為臨洮尹多仁政民歌曰

野有流民惟侯集之邑有田疇惟侯闢之古人謹獄惟
侯哀之有此三惠孰不懷之

塘下童謡

台州太平縣塘下戴某與方谷珍婚戴氏將敗
童謡云云及洪武末戴氏竟籍沒惟二女出嫁

存焉

塘下戴好種菜菜開花好種茶茶結子好種柿柿蒂烏
摘了大姑摘小姑

羅太守歌

桂陽羅以禮永樂中守紹興寬猛得宜遇雨暘
不時往禱輒應民歌曰

太守羅以禮祈晴得晴祈雨得雨

二洪歌

莆田洪楷從子珠後先知紹興府崇尚名教人
歌之曰

大洪小洪先後同風

湯太守歌

安岳湯紹恩為紹興守瀕海潮至滄沒田舍紹
恩為築隄建閘以時蓄洩闢田數千畝越人歌
之曰

泰山巔高於天長江水清見底功名如山水萬古留青

史

越人語

長清李僑嘉靖中知紹興府多惠政時知山陰
縣事李某不得於民每出則以兩鐵索前導而
僑必懸兩爐焚香越人語曰

府香爐縣鐵索一為善一為惡

平湖諺

平湖俞獻字廷貴有行誼熊卓知縣事引與計

事行之民輒曰神明或干以私遂謝弗與通里
人諺曰

郭東俞生當春握冰

嘉興語

金溪洪範知嘉興縣事承知府楊繼宗之後庶
靜寡欲士民語云

洪令楊守承前啟後

童謠

猩猩斑斑跳過南山南山北斗獵迴界口界口北面二

十弓箭

詩話此子童穉日偕間巷小兒聯臂
蹋足而歌者不詳何義亦未有驗

饒州歌 二首

陶安知饒州當入覲民為之歌云云既而復命
守州事載歌云云

千里榛蕪侯來之初萬姓耕闢侯去之日
湖水漚漚侯澤之流湖水有塞我思侯德

賈推官謠

嶧縣賈訪弘治中為建昌推官大璫至廷辱郡
守以下官訪獨與抗禮民謠云

知府一堆泥同知一凶土若非賈推官壞了建昌府

南豐歌

通州馮堅洪武中為南豐典史

一作南豐知縣海陽戴瑀

政

平訟理民懷其德歌曰

山市晴山鳥鳴商旅行農夫耕老瓦盆中冽酒盈呼蹈

隳突不聞聲

南豐歌

建德陳勉景泰中為南豐知縣百廢具舉民歌
之云

大尹陳政事新男耕女織歌陽春

江西謠

弘治中吳江王哲巡按江西有威名民為謠曰
江西有一哲六月飛霜雪天下有十哲太平無休歇

安仁語

南海洗光正德中知安仁縣能辨疑獄百姓語

曰

民無冤訟有洗燈籠訟無滯屈有洗三日

九江語

萬衣為南京刑部主事頻夢其父心動請急歸
抵家九日父沒里人為之語曰

萬孝子生知死

建昌民謠

晉江吳夢相為建昌府推官遷南京大理評事

時人語曰

吳公吳公行李皆空公道服人私情不通

浮梁謠

浮梁人吳十九善製磁器士大夫多與之游時

人語云

成窯太薄永窯厚天下馳名吳十九

萬安上灘諺

一灘高一丈南安在天上

萬載諺

萬載翟昌甫家貧樂道好讀書春夏移書於佛
塔秋冬樓居里人諺云云後以人才舉為郎

春夏塔秋冬樓風吹四面搖昌甫獨不憂

童謠

蒲圻陳文禮字貴和洪武三年由貢生授監察

御史有寃獄久不決童謡云云文禮悟曰罪人必康七也果如其言

斗穀三升米說與陳文禮

王捕虎歌

清苑王哲為湖廣布政使廉正嚴明人不敢干以私歌之曰

王捕虎最執古囊無錢衣有補

漢陽民歌

廣州何澹字中美以天順中進士知漢陽府民
歌之曰

何太守築漢陂饑得食寒得衣

陸青天謠

嘉善陸瑯知武昌府郡人謠曰

陸青天勝明月青天無不青明月有時缺

辰州苗民語

不畏官軍但畏耨屯

沈融谷云苗民負固恃有千萬山
峒軍退則突出軍至則潛藏惟官

金少日人
卷一百
軍糧多築長圍
困之其所畏也

辰州田家諺
二首

四月八日晴魚兒上高坪

十日雨連連高山也是田

詩話廣信府
志亦載此語

蜀人語

安陽崔陞任四川叅政與僉事曲銃並有威名

蜀人語曰

崔參曲僉屹如雪山

崇慶諺

崇慶俗尚浮屠萬輔居喪獨遵家禮鄉人化之

諺曰

萬輔一呼喪禮皆儒

蜀中謠

蜀寇黃中據支羅砦與牛欄坪相望里許萬山
斗絕目為天城謠云

打得支羅砦金珠滿船載打得牛欄坪換箇成都城

播州語

楊友與楊愛兄弟相仇兩州為之不寧土人語
云

骨肉鸚醢參商播凱

萬歷二十七年播酋叛勢甚張十月鄉人譚經歷
怒避兵深巖忽聞石裂有文在石上云云巡撫郭
子章鏤板以傳賊中明年賊果滅

聚山巖人化血石壁壞諸蠻絕

蜀諺

濫瀕冒頂黑石下井

惠安語

洪武中三河安景賢知惠安縣事民頌之曰

安公益止視民如子

興化謠

正德中進士岳池馮馴守興化民謠曰

馮太守來何遲胥吏瘠百姓肥

閩中語

布衣高澂傳汝舟從鄭善夫游學為詩閩人為
之語曰

高垂股傳脫粟言斷斷中歌曲

葉君歌

隆慶中歸善葉春及知惠安縣民愛之如慈父
歌之曰

葉君為政惟飲吾水設施不煩五風十雨

福建語

會稽商為正萬歷初巡按福建與巡撫都御史
龐尚鵬協心共事百廢具興福建語云

恤我甘苦龐父商母

閩中謠

嘉興譚昌言為福建提學人有投私書者槩不
發試竣題數行裹原書復之閩人語云

來一封去兩封以為不信視郵筒

吳公歌

崇禎中新安吳彥芳為莆田令有惠政秩滿去
新縣令催科嚴民乃思吳公歌曰

陽春何去霰雪何來父邪母邪翳惟我懷

武夷諺

一曲一灣一灣一灘

泉州語

洛陽橋一望四里皆琨瑤

莆田諺

橘子黃醫師藏

順德謠 二首

嘉靖初餘姚金蕃知順德縣初政尚嚴民謠云
云比及暮豪強斂獄訟減民復謠云云

朝鰓鰓毛厥施乎夕撼撼石厥畫乎勞乎勞乎盍燕以
教乎

華蓋之屹屹不如尹之無泐碧鑑之粼粼不如尹之無
津長我禾黍穀我士女吁嗟乎膏雨

順德謠

德清胡友信宰順德邑多盜懼民輕法頗尚猛
厲凡獲賊腊其鼻或投諸淵聞者震驚謠曰

山有虎邑有胡無捋其鬚

惠州歌

福州鄭天佐為惠州通判善折獄民歌之曰

縣遲延府一年但懇鄭青天訟無滯民不寃

高州歌

開縣嚴琥同知高州府時大饑琥捐俸以賑民

歌曰

治我嚴父生我慈母

雷州歌

永樂中天台黃敬知雷州府先是郡多囚繫敬
至數日悉為剖決獄盡空民歌之曰

黃公來遲使我無依今公莅政惠我無私

瓊州民謠

瓊州蠻黎岐習馳射自稱神弓萬歷十四年為
官兵所敗請降民謠云

弛神弓來歸降

儋州諺

儋俗事神有上帝會天妃會鄧天君會羊元帥
會鑾輿五采迎神十百大饗于村中景泰天順

間諺云

柳英有銀兒子跳神洪全有金阿母賣鍼

廣東諺

饑食荔支飽食黃皮

黃皮果狀如金彈六月熟其漿酸而除暑熱與荔支並進荔支饜飫

以黃皮解之

蛇珠千枚不及玫瑰

潤蚌之胎有玫瑰文鮓之腹有美玉

文鮓鳴美玉生

高州海中有文鮓鳴似磬而生玉

多食馬蘭少食芥藍

馬蘭食之養血
芥藍不宜多食

廣州諺 七首

爾有垣牆我有火秧

火秧叢生成樹四稜有
芒刺廣人以作籬落

嬰兒瘦探石鷄

石燕產西樵巖穴中足生
翼末小兒羸瘦取食之

家有竹雞啼白蟻化作泥

竹雞形如鷓鴣褐色斑赤
文啼曰泥滑滑白蟻畏之

秋冬食麇春夏食羊

朝為泡魚暮為蒿豬

泡魚大如斗身有棘刺化為
蒿豬齒長入海復化為魚

霜蟹雪螺味不在多

石灣瓦勝天下

粵諺

韶州水急至險者為牯牛灘舟子語云

行過牯牛五石灘寄書歸去報平安

過得牯牛舟子白頭

大廟峽歌

清溪濛裏

二驛名
路多虎

早眠晏起

肇慶府謠

二首

西水自廣西來每歲夏至後淫雨暴漲諺云

水浸釣魚臺上下不得來

釣魚臺峽
中山名

西水漫漫魚蟹滿盤

瓊州諺 二首

瓊州以海水占年海水熱則荒諺曰

海水熱穀不結海水涼禾登場

海南多陽一木五香

瓊州諺

瓊州東界地瘠以羊骨壅田終無獲腴壤多在
西故諺云

東路檳榔西路米糶

徭人謠

羅旁徭九星巖有石其底空洞撞之淵淵作鼓
聲每出劫人擊之以為號其謠云

撞石鼓萬家為我虜

粵西諺

思播田揚兩廣岑黃

言宣慰氏族之大也

花瓦謠

田州女土官瓦氏嘉靖十四年調之征倭至蘇州索有司捕蛇為軍中食敗倭於王江涇時人

語云

花瓦家能殺倭腊而啖之有如蛇

華林謠

江西華林洞賊反檄田州土官岑猛征之猛兵

沿塗剽掠民皆徙邨避之謠云

華林賊來亦得土兵來死不測

藤峽謠

自藤峽徑府江三百餘里諸蠻互為死黨出劫
商船得人則剗其腹投之江中峽人謠云

盜有一斗米莫沂藤峽水囊有一百錢莫上府江船

永通峽謠

藤峽平後正德間遺孽漸蔓峽南尤甚橫江禦

人莫可禁制都御史陳金以諸蠻所嗜魚鹽乃
令商船度峽者以此委之道稍通金疏其事請
名永通峽詔從之未幾諸蠻征索無厭稍不愜
意輒掠殺之潯人謠云

昔永通今求通求不得葬江中誰其作始噫陳公

妖巫歌

金陵初建滇南段寶遣其叔真自會川奉表歸
款朝廷亦以書報之時有妖巫女歌云

莫道君為山海主
山海笑諧諧
園中花謝千萬朵
別有明主來

永寧語

雲南永寧蠻塞矢不刺非於宣德四年糾合四
川鹽井衛土官馬刺非殺永寧土知府各吉八
合已命卜撒襲職矢不刺非復殺之永寧人語
云

土官數奇逢兩刺非

曲靖歌

成化中灌縣焦韶知曲靖府境產瑞禾民歌曰
禾本二穗嘉穀滿田太守焦公仁德及天

楚雄歌

先大父君顓府君諱大競

吳江潘
未填諱

知楚雄府政

尚廉靜甫半載丁內艱幾不能治裝歸郡人歌

曰

清貧太守一世難百鳥有鳳鳳有鸞

滇中諺

山蠻不落葉地蠻湯自熱

貴州謠

鄰水楊純以監察御史按貴州任滿百姓乞留
一年詔許之民乃謠曰

鄰水楊但願年年巡貴陽

貴州宣慰司居水西曰烏蠻為烏羅羅居幕役曰
白蠻曰白羅羅諺云云言至死猶鬪也

水西羅鬼斷頭掉尾

貴州諺

黃平鐵興隆雪

苗人謠

苗家讎九世休

黔中諺

三首

天無三日晴地無三尺平

四月八凍殺鴨

九月重陽移火進房

陳父歌

印江陳表知廣元縣事與利州衛雜處軍強民
弱表申明制度以服武弁民歌曰

古來力役軍三民七陳父定之彼此畫一家用平康勞
者獲息


翰林諺

翰林九年就熱去寒

蘭江諺

金家梁舊酒香

明詩綜卷一百



總校官庶吉士 臣 張能照

校對官庶吉士 臣 嚴 福

騰錄監生 臣 顧 振

財團
去人
佛
陀
教
育
基
金
會
釋
淨
空
敬

